

«ՀԱՍՏԱՏՈՒՄ ԵՄ»

Ա. Թախտաջանի անվան
Բուսաբանության ինստիտուտի տնօրեն՝
Ժ. Հ. Հովակիմյան
«21» օգոստոս, 2026 թ.



ԿԱՐԾԻՔ

ԱՌԱՋԱՏԱՐ ԿԱԶՄԱԿԵՐՊՈՒԹՅԱՆ

Մարգարիտ Արթուրի Տիգրանյանի «Հայաստանի Հանրապետության թրիպսների (Insecta, Thysanoptera) ֆաունան և էկոլոգիական առանձնահատկությունները» թեմայով թեկնածուականատենախոսության վերաբերյալ, որը ներկայացված է Գ.00.08 «Կենդանաբանություն. մակաբուծաբանություն. էկոլոգիա» մասնագիտությամբ կենսաբանական գիտությունների թեկնածուի գիտական աստիճանի հայցման համար

Մարգարիտ Արթուրի Տիգրանյանի կողմից պաշտպանության ներկայացրած «Հայաստանի Հանրապետության թրիպսների (Insecta, Thysanoptera) ֆաունան և էկոլոգիական առանձնահատկությունները» թեմայով ատենախոսությունը նվիրված է Հայաստանի Հանրապետության թրիպսների ֆաունայի տեսակային կազմի, տարածվածության և էկոլոգիական առանձնահատկությունների համակարգված ուսումնասիրությանը, ինչը կարևոր է Հայաստանի միջատաբանական ֆաունայի վերաբերյալ գիտելիքների համալրման, կենսաբազմազանության գնահատման և էկոհամակարգային գործընթացների բացահայտման համար:

Ատենախոսության թեմայի արդիականությունը: Թրիպսները շատ փոքր, հաճախ դժվար նույնականացվող միջատներ են, որոնց մի մասը բույսերի վնասատուներ է, իսկ որոշ տեսակներ կարող են նաև փոխանցել բույսերի վիրուսային հիվանդություններ: Միաժամանակ թրիպսների բոլոր տեսակները վնասակար չեն. որոշները գիշատիչ են, իսկ մյուսները կապված են սնկերի, ծաղիկների և բույսերի տարբեր օրգանների հետ: Թրիպսների վերաբերյալ պաշտպանության ներկայացվող թեման խիստ արդիական է ինչպես տեսական, այնպես էլ կիրառական առումներով: Արդիականությունը հատկապես մեծանում է թրիպսների մի շարք

տեսակների գյուղատնտեսական նշանակությամբ, քանի որ դրանք կարող են հանդիսանալ մշակաբույսերի վնասատուներ: Ստացված տվյալները կարող են հիմք հանդիսանալ վնասատու տեսակների տարածվածության կանխատեսման, դրանց դեմ պայքարի առավել նպատակային և էկոլոգիապես անվտանգ միջոցառումների մշակման, ինչպես նաև Հայաստանի ագրոէկոհամակարգերի կայունության գնահատման համար: Թրիպսները էական դեր են կատարում նաև բույսերի փոշոտման գործընթացում: Հետևաբար, ատենախոսության թեման համապատասխանում է ժամանակակից միջատաբանության, էկոլոգիայի և կենսաբազմազանության պահպանության, ինչպես նաև գյուղատնտեսական վնասատուների կառավարման, բույսերի բերքատվության բարձրացման և բույս-միջատ փոխհարաբերությունների ուսումնասիրման արդի խնդիրներին:

Հետազոտության նպատակն է Հայաստանի Հանրապետության տարածքում թրիպսների (Insecta, Thysanoptera) ֆաունայի համակողմանի ուսումնասիրությունը՝ տեսակային կազմի, տարածվածության և էկոլոգիական առանձնահատկությունների բացահայտմամբ, ինչպես նաև տարբեր բնական և մարդածին էկոհամակարգերում դրանց տարածման օրինաչափությունների գնահատմամբ:

Այդ պատակին հասնելու համար ընդհանուր առմամբ առաջադրվել են հետևյալ **խնդիրները**.

Ուսումնասիրել և ճշտել Հայաստանի Հանրապետության տարածքում տարածված թրիպսների ձևաբանական առանձնահատկությունները և բացահայտել դրանց տեսակային կազմը՝ հիմնվելով դաշտային ուսումնասիրությունների, հավաքված նյութերի, ինչպես նաև գրական և թանգարանային տվյալների համադրման վրա:

Բացահայտել թրիպսների աշխարհագրական և տարածքային տարածվածությունը Հայաստանի տարբեր ֆիզիկաաշխարհագրական և բարձրադիր գոտիներում, պարզաբանել դրանց հանդիպման հիմնական օրինաչափությունները և ուսումնասիրել դրանց էկոլոգիական առանձնահատկությունները՝ կապված բնակության միջավայրի, կենսակերպի, սննդային մասնագիտացման և կենսաբանական առանձնահատկությունների հետ:

Ուսումնասիրել գյուղատնտեսական նշանակություն ունեցող թրիպսների տեսակային կազմն ու տարածվածությունը և գնահատել դրանց հնարավոր վնասակարությունը մշակաբույսերի համար:

Իրականացնել Հայաստանի Հանրապետության համար կարանտինային նշանակություն ունեցող վնասատու՝ Արևմտյան ծաղկային թրիպսի մոլեկուլային հետազոտություն, բացահայտել այդ տեսակի գենետիկական կապերը և կառուցել դրա ֆիլոգենետիկ ծառը:

Աշխատանքի տեսական և գործնական նշանակությունը: Բնական և մարդածին էկոհամակարգերում թրիպսներն ունեն բազմակողմանի նշանակություն: Աշխատանքի տեսական նշանակությունը Հայաստանի Հանրապետության թրիպսների (Insecta, Thysanoptera) ֆաունայի վերաբերյալ գիտական տվյալների համալրումն ու համակարգումն է: Ատենախոսի կողմից ճշտվել և լրացվել են թրիպսների տեսակային կազմի, տարածվածության և էկոլոգիական առանձնահատկությունների վերաբերյալ առկա տվյալները: Ստացված արդյունքները կարող են օգտագործվել Հայաստանի թրիպսների ֆաունայի ժամանակակից վիճակի գնահատման, ինչպես նաև ֆաունիստիկայի, տաքսոնոմիայի, կենսաաշխարհագրության և էկոլոգիայի բնագավառներում հետազոտումնասիրությունների համար:

Հետազոտության արդյունքները կարող են կիրառվել գյուղատնտեսական մշակաբույսերի վնասատու ֆիտոֆագ թրիպսների հայտնաբերման, դրանց տարածվածության մոնիթորինգի և պայքարի միջոցառումների գիտական հիմնավորման նպատակով: Թրիպսների տեսակային կազմի, սննդային կապերի, տարածվածության և սեզոնային դինամիկայի վերաբերյալ ստացված տվյալները կարող են օգտագործվել բույսերի պաշտպանության, վնասատուների տարածվածության կանխատեսման և ինտեգրված պայքարի ծրագրերի մշակման ու իրականացման ընթացքում: Աշխատանքի արդյունքները կարող են կիրառական նշանակություն ունենալ նաև կարանտինային և ֆիտոսանիտարական միջոցառումների իրականացման, ինչպես նաև միջատաբանության և էկոլոգիայի ոլորտներում մասնագիտական կրթության գործընթացում:

Ելնելով վերոգրյալից՝ Մարգարիտ Տիգրանյանի ատենախոսական աշխատանքն ունի կարևոր տեսական և գործնական նշանակություն:

Ատենախոսությունը ներկայացված է համակարգչային շարվածքով՝ 169 էջի վրա: Այն կազմված է ներածությունից, չորս գլխից, եզրակացություններից, 84 աղյուսակ ընդգրկող գրականության ցանկից: Աշխատանքն ընդգրկում է նաև 52 նկար, 7 աղյուսակ և 3 գծանկար:

Ատենախոսության գրական ակնարկում, համակարգչային շարվածքով 14 էջի (9–22) սահմաններում, ատենախոսի կողմից ներկայացված են Թրիպսների կամ

Ծոպաթևավորների կարգի կարգաբանական, ձևաբանական և էկոլոգիական առանձնահատկությունները: Նշվում է, որ թրիպսների համաշխարհային ժամանակակից ֆաունան ընդգրկում է շուրջ 6 հազար տեսակ: Հասուն առանձնյակների ձևաբանական կառուցվածքն առանձնանում է թևերի եզրերի ծոպանման մագիկներով, ոտքերի ծայրային հատվածում գտնվող պարկանման բշտիկներով և նեղ, մինչև 1 մմ երկարություն ունեցող մարմնով: Գրական տվյալների հիման վրա վերլուծվում են նաև սահմանափակ թվով ցեղերի ներկայացուցիչների գենետիկական հետազոտությունները, սննդառության առանձնահատկությունները, տեր բույսերի հետ փոխազդեցությունները և բազմացման առանձնահատկությունները:

Նյութը և ուսումնասիրության մեթոդները: Երկրորդ գլխում՝ «Նյութը և ուսումնասիրության մեթոդները» (էջ 23–27), ներկայացված են դաշտային նմուշառման մեթոդները, միջատների մշտական պատրաստուկների պատրաստման եղանակները, ինչպես նաև մոլեկուլային-գենետիկական ուսումնասիրությունների մեթոդաբանությունը և կիրառված համապատասխան մեթոդներն ու ենթամեթոդները՝ ԴՆԹ-ի անջատում, ՊՇՌ-ամպլիֆիկացիա, էլեկտրաֆորեզ, սեքվենավորման արդյունքների մշակում և ուղղում, ֆիլոգենետիկ ծառի կառուցում և էվոլյուցիոն վերլուծություն:

Անհրաժեշտ է ընդգծել, որ Մարգարիտ Տիգրանյանի «Նյութը և ուսումնասիրության մեթոդները» գլուխը լիարժեք է և մեթոդաբանորեն համապատասխանում է թեկնածուականատենախոսության մակարդակին:

Ատենախոսության ամենածավալուն գլուխը՝ «Հայաստանի Հանրապետության թրիպսների տեսակային կազմը» (էջ 28–138), նվիրված է սեփական հետազոտությունների արդյունքների և դրանց վերլուծության շարադրմանը և ներառում է ատենախոսության հիմնական նյութը: Գլխում նկարագրվում են թրիպսների 54 տեսակների ձևաբանական առանձնահատկությունները, տարածվածությունը Հայաստանում և աշխարհում, էկոլոգիական առանձնահատկությունները և տնտեսական նշանակությունը: Յուրաքանչյուր տեսակի նկարագրությունն ուղեկցվում է տվյալ տեսակի մարմնի և դրա առանձին մասերի բովանդակալից լուսանկարներով:

Ատենախոսության չորրորդ՝ «Թրիպսների տարածվածությունն ու կիրառական նշանակությունը Հայաստանում» գլխում, որը շարադրված է 10 էջի սահմաններում, ատենախոսը քանակական գնահատման է ենթարկել թրիպսների տեսակների տարածվածությունն ըստ մարզերի և բավականին մանրամասն ներկայացրել դրանց տեր

բույսերի տաքսոնոմիական բազմազանությունը: Նշվել են Հայաստանի Հանրապետության և առանձին մարզերի համար նոր տեսակները, ինչպես նաև թրիպսների համար նոր տեր բույսերի տեսակները: Ներկայացվել է թրիպսների բաշխումն ըստ կենսատիպական առանձնահատկությունների՝ ֆիտոֆագ, գիշատիչ, միցետոֆագ և տնտեսապես կարևոր տեսակներ: Գլխում մանրամասն ուսումնասիրվել են նաև կարանտինային նշանակություն ունեցող *Frankliniella occidentalis* տեսակի մոլեկուլային-գենետիկական հետազոտությունների արդյունքները, ներկայացված է տեսակի ֆիլոգենետիկ ծառը (նկ. 54):

Չնայած հեղինակի կողմից կատարված աշխատանքի մեծ ծավալին, գիտական, գործնական մեծ կարևորությանը, անհրաժեշտ ենք համարում նշել, որ աշխատանքում առկա են որոշ թերություններ և տեխնիկական անճշտություններ, որոնք, սակայն, շտկելի են և չեն նվազեցնում ատենախոսի կատարած աշխատանքի գիտական արժեքը:

- Աշխատանքի նպատակներն ու խնդիրները» բաժնում ցանկալի կլիներ որպես **առանձին** խնդիր ներառել թրիպսների տեր բույսերի բացահայտումը, հատկապես հաշվի առնելով այն հանգամանքը, որ ատենախոսը լիարժեք իրականացրել է այդ կարևոր և ծավալուն աշխատանքը:
- Ատենախոսության եզրակացություններ բաժնի երկրորդ կետում նշվում է, որ թրիպսները գրանցվել են 777-ից 2568 մ բարձրություններում, և նշվել է այդ բարձրությունների միջին թվաբանական թիվը: Ցանկալի կլիներ ստորին, միջին և վերին բարձրություններին զուգահեռ, տրվեր, թե հատկապես որ բարձրություններում են թրիպսները առավել շատ հանդիպել:
- Նույն կետում նշվում է նաև, որ թրիպսները հանդիպում են տվյալ բարձրությունների բոլոր լանդշաֆտներում: Աշխատանքը ավելի կշահեր, եթե լանդշաֆտների փոխարեն կամ դրան զուգահեռ տրվեյին այն **բնակմիջավայրերը**, որտեղ առավել հաճախ են հանդիպում այդ միջատները՝ օգտվելով Գ. Ֆայվուշի և Ա. Ալեքսանյանի 2016 թվականին հրատարակված աշխատանքից (Файвуш Г.М., Алексанян А.С. Местообитания Армении. Ереван, Институт ботаники НАН РА, 2016):
- Ատենախոսության 156-րդ էջում (ենթագլուխ 4.3) նշվում է, որ Արևմտյան ծաղկային թրիպսի 17 նմուշները գեն վերլուծության են ենթարկվել, սակայն ծառում արտացոլված է մեկ նմուշ: Անհրաժեշտ էր նշել, թե որ մարզից և ինչ տեր բույսից էր հավաքվել, այդ մեկ նմուշը:
- Ատենախոսի կողմից բավականին մեծ և օգտակար աշխատանք է կատարվել թրիպսների տեր բույսերի նույնականացման համար, սակայն հարկավոր է որոշ անվանումների՝

հատկապես գյուղատնտեսական մշակաբույսերի առումով, ճշտումներ կատարել: Օրինակ Ադրուսակ 3-ում նշված *Thymus coccineus* B. անվանման հեղինակային կրճատումը և տաքսոնոմիական կարգավիճակը անհրաժեշտ է ճշտել՝ այն համապատասխանեցնելով IPNI և POWO միջազգային անվանացանկերում ընդունված տվյալներին: Վերջիններիս համաձայն՝ միջազգային անվանացանկերում նշվում են միայն *Thymus serpyllum* var. *coccineus* (Backh.f.) L.H.Bailey, *Thymus coccineus* Group, *Thymus praecox* ‘Coccineus’ և դրանց հոմանիշ՝ *Thymus praecox* subsp. *britannicus* (Ronniger) Holub անվանումները:

- Կարելի է նշել նաև, որ որոշ բուսատեսակների հեղինակների անունները կրճատ ձևով են ներկայացված (օրինակ՝ նույն՝ Ադրուսակ 3-ում գրված է *Tragopogon reticulatus* B.), ուստի ցանկայի է հետազայում առավել մանրամասն ուշադրություն դարձնել բույսերի անվանացանկին և նոմենկլատուրային հարցերին:
- Ադրուսակ 7-ում տվյալների դասավորման սկզբունքը հստակ չէ: Մեր կարծիքով՝ նպատակահարմար կլիներ տվյալները դասավորել կա՛մ միջատների մարմնի երկարության աճման հաջորդականությամբ, կա՛մ տեր բույսերի անվանումների այբբենական կարգով:
- Մանր տեխնիկական վրիպակներից կարելի է նշել օրինակ, որ նկար 50-ից հետո հաջորդ նկարը համարակալված է որպես 53 և այլն:

Ամփոփելով վերոգրյալը՝ կարելի է եզրակացնել, որ կատարված դիտողությունները էական և սկզբունքային բնույթ չեն կրում և չեն ազդում կատարված աշխատանքի բարձր գիտական մակարդակի վրա:

Մ. Տիգրանյանի կողմից կատարված աշխատանքը կատարված է տեսական և մեթոդական բարձր մակարդակով, շարադրված է մասնագիտական առումով պատշաճ կերպով, ձևակերպված է գրագետ հայերենով, հիմնված է ծավալուն փաստացի նյութի հիման վրա: Ստացված փորձարարական աշխատանքների արդյունքները հավաստի են և լիովին համոզիչ, հեղինակին հաջողվել է ամբողջությամբ լուծել իր առջև դրված խնդիրները՝ գիտական տեսակետից բավականին բարձր մակարդակով: Նպատակահարմար է շարունակել Մարգարիտ Տիգրանյանի՝ թրիպսների ուսումնասիրությանը նվիրված հետազոտությունները և հրապարակել հետագա ուսումնասիրությունների արդյունքում ստացված ամբողջական արդյունքները:

Ատենախոսության սեղմագիրը լիովին համապատասխանում է աշխատանքի բովանդակությանը, իսկ ՄԳՇ-ներում հրատարակված 4 գիտական աշխատանքները արտահայտում են ատենախոսությունում բերված հիմնական դրույթները:

Մարգարիտ Արթուրի Տիգրանյանի «Հայաստանի Հանրապետության թրիպսների (Insecta, Thysanoptera) ֆաունան և էկոլոգիական առանձնահատկությունները» թեմայով ատենախոսությունն իր արդիականությամբ, գիտական նորույթով, փաստացի նյութի ծավալով, բովանդակությամբ, գիտական և գործնական նշանակությամբ համապատասխանում է ՀՀ ԲԿԳԿ-ի կողմից թեկնածուական ատենախոսությունների ներկայացվող ՀՀ-ում գիտական աստիճանի շնորհման կանոնակարգ»-ի 7-րդ կետի պահանջներին, իսկ հեղինակն արժանի է կենսաբանական գիտությունների թեկնածուի գիտական աստիճանի շնորհմանը Գ.00.08 «Կենդանաբանություն. մակարուծաբանություն. էկոլոգիա» մասնագիտությամբ:

Ատենախոսությունը քննարկվել է Ա.Լ. Թախտաջյանի անվան Բուսաբանության ինստիտուտի 2026 թվականի օգոստոսի 21-ի թիվ ՆՆ նիստում: Մասնակցել են ՀՀ ԳԱԱ թղթ. անդամ Ժ.Հ. Վարդանյանը, կենս. գիտ. դոկտորներ Գ.Մ. Ֆայվուշը, Ժ.Ա. Հակոբյանը, Գ.Հ. Օզանեզովան, Ի.Գ. Գաբրիելյանը, կենս. գիտ. թեկնածուներ Ժ.Հ. Հովակիմյանը, Ա.Ն. Ներսեսյանը, Ա.Լ. Աշոյանը:

Ա.Լ. Թախտաջյանի անվան Բուսաբանության ինստիտուտի հնչարուսաբանության բաժնի վարիչ, կենս. գիտ. դոկտոր՝



Ի.Գ. Գաբրիելյան

Հաստատում եմ Ի.Գ. Գաբրիելյանի ստորագրությունը

Ա.Լ. Թախտաջյանի անվան Բուսաբանության ինստիտուտի գիտական քարտուղար, կենս. գիտ. թեկնածու՝

Ա.Լ. Աշոյան

